

Hug Orann-Oro

B'ann air céilidh an Dun-éideann, o chionn fhichead bliadhna, a chuala Uilleam MacMhathain an t-òran so, agus mas math a chuimhne, 'sann aig duine a mhuinntir Gheàrrloch a chuala e é. Chòrd an t-òran cho math ris is gun do thog e air a' cheud éisdeachd e. Thug e na facail agus am fonn dhuinn o chionn ghoidid.

Tha cuid de rainn an òrain so, agus rainn '‘Fear a' Bhàta,’’ a réir coltais, air a dhol troimh a chéile. Ach is iongantach mura deach an t-òran so a dhèanamh ri ceud linn nan Réiseamaidean Gaidhealach, agus dh'fhaodadh gur h-e Rìgh Deòrsa III a tha air ainmeachadh anns a' cheud cheathramh.

Ma tha tha ceathramhan eile de'n òran aig duine sam bith de ar luchd-leughaidh, bu mhath leinn sgeul fhaighinn orra.—FIR-DEASACHAIDH.

Hug órann-óro gur toigh leam fhìn thu
'S toigh leam fhìn thù, 's tu leam as bòidhche,
Blas na meala air do phògan,
Bidh mi 'gad chaoidh o'n a rinn thu seòladh.
Hug órann-óro gur toigh leam fhìn thu.

'S fhada, 's fhada, 's gur fhad air falbh thu,
Air long Rìgh Deòrs' le do chòta dearg ort;
'S tric mo shùilean air an fhàirge
Fiaich am faic mi fear do dhealbha.

Hug órann-óro gur toigh leam fhìn thu.

'S fhada, 's fhada 's gur fhada muigh thu,
Gun fhios, a luaidh, nach e'n cuan a shluig thu;
Gur e'n gaol le chéile thug sinn
A dh'fhàg ad dhéidh mi cho deurach duilich.

Hug órann-óro gur toigh leam fhìn thu.

Their iad rium gu robh thu gòrach
Gum biodh tu tric anns na tighean-òsda,
Nach robh stocainn 's nach robh bròg ort,
'S ciamar a dh'fhaodainn a ghaoil do phòsadh.

Hug órann-óro gur toigh leam fhìn thu.

Ach 's truagh nach robh mi 'nam èan beag aotrom
Mar an uiseag no mar an fhaoileag—
'S mi gu siùbhladh thar nan caoiltean
Gus an ruiginn far eil mo ghaol-sa.

Hug órann-óro gur toigh leam fhìn thu.